



## **Komunikadu Imprensa**

**Dili, 23 Jullu 2019**

### **Munisipíu Oekusi-RAEOA**

#### **Xefe suku Nipani foin primeravés simu informasaun kona-ba direitu labarik no asesu ba justisa formál**

Iha 19 Jullu 2019, JSMP realiza treinamentu kona-ba direitu labarik no asesu justisa formál ba iha Komunitade Suku Nipani, Sub-rejiaun Pante Makasar, Rejiaun Oekusi-RAEOA.

Partisipante sira iha treinamentu ne'e hamutuk na'in 22, feto na'in 9 no mane na'in 13. Partisipante sira ne'e mai hosi xefe suku, xefe aldeia balun, lia na'in, Ofisiál Polísia Suku (OPS), profesora sira no comunidade Suku Nipani.

Treinamentu ne'e ho objetivu atu hasae koñesimentu comunidade suku Nipani nian kona-ba direitu labarik nian liga ho oinsa atu fó protesaun ba labarik sira iha kontestu família, comunidade no sosiedade no dalan hodi asesu ba justisa formál bainhira labarik sai vítima ba kazu ruma ka konflitu ho lei," dehan Diretór Interinu JSMP, Casimiro dos Santos.

Treinamentu ne'e hetan partisipasaun másimu hosi partisipante sira liuhusi pergunta no preokupasaun sira liga ho labarik sira nia direitu espesífiku, liuliu labarik sira ne'ebé konflitu ho lei (na'ok ka baku ema), edukasaun inan-aman ne'ebé ho maneira violénsia no labarik sira ne'ebé abandonadu.

Hatan ba pergunta no preokupasaun sira ne'e, JSMP esplika kona-ba lei sira ne'ebé garantia no fó protesaun espesial ba direitu labarik nian tantu iha família laran no Estadu. Labarik sira hetan protesaun espesial tanba labarik seidak iha kapasidade atu hola desizaun no seidak bele proteje sira nia-an rasik. Kestaun kona-ba labarik sira konflitu ho lei, JSMP esplika kona-ba responsabilidade ba krime ne'ebé define iha artigu 12 KP. Artigu ne'e hateten katak ema ida halo krime nia rasik mak sei responsabiliza. Maibé ba labarik sira ne'ebé ho idade tinan 16 mai karik, sira labele responsabiliza ba sira nia aktu krime ne'ebé sira halo tanba konsidera sira seidak iha kapasidade ne'ebé maduru atu koñese sira nia aktu ne'e rasik (artigu 20 KP) kona-ba inimputabilidade tanba idade<sup>1</sup>.

Preokupasaun kona-ba eduka oan ho violénsia, JSMP esplika katak inan-aman ne'ebé hanorin nia ona ho maneira baku ne'e krime (artigu 155 KP) kona-ba maus tratus ba menór<sup>2</sup>.

---

<sup>1</sup> Artigu 20 kona-ba inimputabilidade tanba idade (1) Ema ne'ebé seidak iha tinan 16 iha inimputabilidade penál.

<sup>2</sup> Artigu 155 kona-ba aaus-tratus ba menór (1) Ema ne'ebé tenke tau-matan ba menór ho tinan ki'ik liu 17, iha responsabilidade ba nia edukasaun ka uza nia hanesan subordinadu iha aktividade laborál no: a) hamosu ofensa ba nia isin ka saúde, halo maus- tratus fíziku no psíkiku ka tratamentu kruél ba nia;

Preokupasaun seluk kona-ba aman abandona oan, JSMP esplika kona-ba responsabilidade inan-aman tuir lei liu-liu kona-ba obrigasaun atu fó alimentasaun ba oan tantu mós ba inan-aman ne'ebé husik ona oan sira. Lei sivíl fó obrigasaun ba aman ka inan atu kuidadu no fó alimentu ba nia oan sira se aman ka inan la kumpri nia obrigasaun ne'e, konsidera inan-aman komete krime la halo tuir obrigasaun alimentár (artigu 225 KP)<sup>3</sup>. Aleinde ne'e, JSMP esplika kona-ba ezersísiu podér paternál (artigu 1758 Kodigu Sivíl) ne'ebé hateten katak inan-aman iha dever tuir interese diak oan sira nian atu asegura seguransa no saude diak oan sira nian, haree ba sira nia edukasaun, reprezenta sira no administra sira nia riku-soin.

Iha abertura treinamentu ne'e, Xefe Suku Nipani, Sr. Pedro S. N. Elo agradese ba JSMP tanba bele tama ba iha sira nia suku hodi fahe informasaun kona-ba direitu labarik no asesu ba justisa formal tanba durente nia mandatu foin primeravés simu informasaun hirak ne'e. Xefe suku mós apela ba partisipante sira atu fó atensaun ba materia ne'ebé fasilitadór sira esplika nune'e bele hatene kona-ba direitu labarik nian no oinsa atu prosesu tuir justisa formál kuandu labarik sira hasoru krime ruma.

Iha enseramentu, Xefe Suku ne'e rekomenda ba JSMP atu iha futuru bele kontinua fasilita treinamentu hanesan ba membru konsellu suku (xefe Aldeia, Lia-nain, representante feto, representante joventunde). Atu nune'e, iha enkontru Aldeia nian, sira bele hatutan informasaun sira ne'e ba iha comunidade sira hotu.

Treinamentu ne'e realiza tanba hetan apoiu finanseiru hosi Hivos.

Atu hetan informasaun liutan favor kontaktu direktamente:

Casimiro dos Santos  
Diretór Interino JSMP  
Diresaun e-mail: [casimiro@jsmp.tl](mailto:casimiro@jsmp.tl)  
Website: <http://jsmp.tl/>  
Telefone: 3323883 | 77257466

---

<sup>3</sup> Artigu 225 KP kona-ba La halotuir obrigasaun alimentár (1) Ema ne'ebé iha obrigasaun atu fóalimentu<sup>112</sup> no iha kondisaun atu halotuir obrigasaun ne'e maibé la halotuir obrigasaun ne'e too hamosu perigu ba alimentandu atu laiha meu hodi satisfáz nia nesetidade fundamentál, maski ema seluk nia ajuda hadook tiha perigu ne'e, sei hetan pena prizaun too tinan 3 ka multa.